

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI



Broj: 02-05-2669/19-AP-14
Datum: 31.12.2020. godine

PROGRAM RADA OPĆINSKOG NAČELNIKA ZAVIDOVIĆI
I ORGANA UPRAVE ZA 2020. GODINU



Broj: 02-05-2669/19-AP-14
Datum: 31.12.2019. godine

Na osnovu člana 39. Statuta općine Zavidovići („Službeni glasnik općine Zavidovići“ broj: 5/2005, 5/a/2008 i 11/2019), člana 15. stav 1. alineja 2. Zakona o principima lokalne samouprave u Federaciji Bosne i Hercegovine („Službene novine Federacije BiH”, broj: 49/06 i 51/09), Općinski načelnik Zavidovići donosi:

PROGRAM RADA

Općinskog načelnika Zavidovići i organa uprave za 2020. godinu

Program rada Općinskog načelnika Zavidovići i organa uprave za 2020. godinu sadrži:

- Uvod,
- Ciljevi i aktivnosti koje će se provoditi na ostvarenju ciljeva za 2020. godinu,
- Program rada službi za upravu i posebnih službi Općine Zavidovići za 2020. godinu.

I - UVOD

Pravni osnov za izradu Programa rada Općinskog načelnika za 2020. godinu sadržan je u odredbama iz člana 98. Zakona o organizaciji organa uprave u FBiH („Službene novine FBiH“, broj: 35/05), odredbama člana 13. i 15. Zakona o principima lokalne samouprave u FBiH („Službene novine FBiH“, broj: 49/06 i 51/09), te odredbama Statuta Općine Zavidovići („Službeni glasnik općine Zavidovići“, broj: 5/2008, 5/a/2008 i 11/2019). Nadalje se Program rada Općinskog načelnika za 2020. godinu zasniva na zakonski definisanim nadležnostima općinskog načelnika i općinskih službi, a polazeći od potreba društvene zajednice koje su nastale tokom 2019. godine, te nadležnostima koje su nastale u protekloj godini bilo donošenjem zakonskih propisa viših nivoa vlasti bilo donošenjem akata Općinskog vijeća Zavidovići. Izrade ovog Programa rada zasniva se na nekoliko temeljnih principa, među kojima su najvažniji objektivno prikupljanje svih relevantnih činjenica i njihovoj ocjeni, te korištenje raspoloživih podataka, statističkih mjerenja privrednih, socijalnih i drugih pojava koje imaju ili bi mogle da imaju efekte na položaj i ulogu Općine Zavidovići u društvenom poretku Zeničko-dobojskog kantona, Federacije Bosne i Hercegovine i države Bosne i Hercegovine. Prilikom izrade ovog Programa vođeno je računa o programskim aktivnostima koje su definisane Strategijom integriranog razvoja općine Zavidovići za period 2017. – 2026. godina („Službeni glasnik općine Zavidovići“, broj: 3/2017), Strategijom razvoja poljoprivrede općine Zavidovići za period 2017. – 2023. godina („Službeni glasnik općine Zavidovići“, broj: 7/2017), Općinskim planom upravljanja otpadom 2017. - 2022. („Službeni glasnik općine Zavidovići“, broj: 3/2017), Planom Kapitalnih investicija Općine Zavidovići za period 2020. – 2024. godine („Službeni glasnik općine Zavidovići“, broj: 8/2019), Programom rada Općinskog vijeća Općine Zavidovići za 2020. godinu („Službeni glasnik općine Zavidovići“, broj: 12/2019), te procjeni realizacije programskih aktivnosti Općinskog načelnika i Općinskog vijeća Zavidovići u 2019. godini. Nadalje se ovaj Program zasniva na informacijama o

ukupnim kretanjima u Bosni i Hercegovini na području stranih investicija, raspoloživim fondovima i rejtingu naše zemlje koji ima na međunarodnom planu. Kada je u pitanju izvršavanje poslova izvorne nadležnosti općine Zavidovići ili podijeljene nadležnosti sa drugim nivoima vlasti nastaviti će se sa njihovom potpunom provedbom kao u proteklim periodima, izvršavanjem općinske politike, kao i obavljanje svih dužnosti koje na općinu prenese kantonalne i federalne vlasti.

Iz niže prikazanih ciljeva koji će se realizovati tokom 2020. godine zaključuje se da su one usmjerene ka poboljšanju ukupnog ambijenta za privredni razvoj i normalno djelovanje privrednih i drugih subjekata, izgradnji i rekonstrukciji cestovne infrastrukture, izgradnji i rekonstrukciji vodnih i kanalizacionih objekata, obnovi infrastrukturnih objekata oštećenih ili uništenih tokom stanja prirodne nesreće u 2014. godini, bolji život građana, te njihovo učešće u donošenju svih odluka za koje su neposredno zainteresovani.

Izradom ovog Programa obuhvaćeni su svi bitni pokazatelji, osobine i segmenti lokalnog društva kao što su prostorno-teritorijalni i geografski položaj općine, stepen razvijenosti infrastrukture i njene odlike, stanovništvo kao najvažniji razvojni faktor, privredni potencijali općine i njihovo stavljanje u funkciju, a radi sagledavanja stvarnog stanja i realizacije projekata kojim će se na najbolji mogući način ostvariti funkcije općine kao jedinice lokalne samouprave.

II – CILJEVI I AKTIVNOSTI KOJE ĆE SE PROVODITI NA OSTAVRENJU CILJEVA ZA 2020. GODINU

II. 1. OBLAST PRIVREDE

Prema pokazateljima ozbiljnih kompanija koje se bave istraživanjem tržišta i podataka u privredi (npr. LRS d.o.o.) i koje svoja istraživanja i izvještaje baziraju na podacima zvaničnih institucija (podaci dobiveni od APIF-a, FIA-e, Centralne banke Bosne i Hercegovine, Porezne uprave, Sudskog registra Federacije Bosne i Hercegovine itd.) općina Zavidovići spada u kategoriju srednjih općina rangirana na 15. mjestu. Ovo rangiranje je izvršeno na osnovu rasta izvoza, broja privrednih subjekata na 1000 stanovnika i prosječnom prihodu po uposlenom. Ono što želimo naglasiti da na području općine Zavidovići ima 157 firmi od kojih su 30 firmi rangirane kao pouzdane firme, 5 firmi je našlo svoje mjesto među 100 najvećih kompanija u Bosni i Hercegovini dok su 4 firme rangirane kao brzorastuće kompanije.

Ove informacije daju za pravo i obavezu da se tokom 2020. godine planiraju aktivnosti na obezbjeđivanju novih resursa koji će za rezultat imati otvaranje novih radnih mjesta i privredni rast. Usvajanje Prostornog plana općine Zavidovići stvorene su mogućnosti korištenja zemljišta u izgradnju objekata koji će imati pomenutu svrhu, te će dati signal i jasnu sliku potencijalnim investitorima da na području općine Zavidovići postoji mogućnost sigurnog ulaganja i investiranja radi organizovanja proizvodnje, zapošljavanja i sticanje profita. Dalje će Prostorni plan općine Zavidovići osigurati korištenje novih površina zemljišta za formiranje novih industrijskih zona i formiranje poljoprivrednih parcela sa intenzivnom obradom. Na taj način će se premostiti neizvjesnost oko aktiviranja industrijskog kompleksa Krivaja na koji se svakako računa u budućnosti kao resurs privrednog razvoja i industrije općine Zavidovići, te stvoriti pretpostavku za razvoj jedne nove grane privrede odnosno razvoj poljoprivredne proizvodnje voća, jagodičastog voća i sličnih kultura koje su prilagođene za uzgoj za naše klimatsko podneblje.

Općina Zavidovići će za 2020. godinu obezbijediti sredstva za realizaciju projekta „Izgradnja oborinske kanalizacije u poduzetničkoj zoni „Ekonomija-Batvice“ u iznosu 250.000,00 KM koje finansira od strane Federalnog ministarstva razvoja, poduzetništva i obrta uz sufinansiranje realizacije ovog projekta od strane Općine Zavidovići u iznosu 111.698,50 KM.

Aktivnosti koje će se nastaviti provoditi tokom 2020. godine, a koja će za cilj imati nastavak aktivnosti stvaranja i unapređenje postojećeg povoljnog ambijenta za privređivanje radi očuvanja certifikata BFC SEE – Business Friendly Certificate South East Europe koji je Općini Zavidovići dodijeljen u 2019. godini. Program certifikacije općina sa povoljnim poslovnim okruženjem je instrument koji omogućava ocjenu kvaliteta lokalnih zajednica u pogledu investicionih potencijala, infrastrukture, usluga i informacija koje se nude potencijalnim investitorima i postojećoj privredi. Program vrši i procjenu kvaliteta usluga i informacija koje se pružaju kao podrška privrednicima, kao i efikasnost procesa koji su u vezi sa poslovnom klimom. Konačno, certifikacija mjeri obim investicionih mogućnosti i način na koji se te mogućnosti koriste. Program certifikacije ujedno ima za cilj da unaprijedi saradnju svih aktera koji su uključeni u proces privlačenja i realizacije investicija, kao i da promoviše standarde koji utiču na kreiranje povoljne poslovne klime. Cjelokupan postupak certifikacije sa povoljnim poslovnim okruženjem osmišljen je da bude održiv. On se ogleda kako u tome da jednom uspostavljene kvalitetne procedure i postupci u općinskoj administraciji nastavljaju da funkcionišu u narednom periodu, tako i u činjenici da je rok važenja certifikata ograničen (2 godine).

Saradnja sa Privrednim savjetom općine Zavidovići će usmjeravati aktivnosti općinskih službi za upravu i donošenje općinskih propisa kao stvaranju i unapređenju postojećeg povoljnog ambijenta za privređivanje na području općine Zavidovići. Privredni savjet općine Zavidovići formiran je rješenjem Općinskog načelnika broj 02-05-1818/17-AP-2 od 22.05.2017. godine i broji 15 članova od kojih 50 % članova čine predstavnici poslovne zajednice općine Zavidovići iz raznih grana privrede i djelatnosti. Privredni savjet je formiran zbog certifikacije Općine Zavidovići kao općina sa povoljnim poslovnim okruženjem odnosno sticanje certifikata BFC SEE – Business Friendly Certificate South East Europe, te će i dalje imati neizostavnu ulogu u zadržavanju certifikata kroz svoje nadležnosti. Postojanje Privrednog savjeta predstavlja formalan i organiziran način za javno-privatni dijalog. Posvećenost rukovodstva lokalne samouprave dijalogu sa privrednicima ukazuje da i budući investitori mogu očekivati korektan partnerski odnos, te da će se ključne odluke donositi pažljivo i uz puno poštovanje svih činilaca lokalne zajednice. Na ovaj način se dokazuje funkcionalnost i kontinuitet javno-privatnog dijaloga, sa ciljem jačanja privatnog sektora i ekonomskog rasta. Privredni savjet je stalno tijelo koje prati sva pitanja koja su od interesa za privredu i lokalni ekonomski razvoj i predlaže lokalnoj samoupravi aktivnosti na unapređenju uslova za poslovanje, ukazuje na potrebe i prepreke koje privreda ima u poslovanju u neposrednom lokalnom okruženju, pruža savjetodavnu podršku Općinskom načelniku prilikom odlučivanja u vezi ekonomskog razvoja i razvojnih programa, saraduje sa kancelarijom za lokalni ekonomski razvoj i učestvuje u izradi lokalnih razvojnih dokumenata.

Sredstva planirana u Budžetu općine Zavidovići za 2020. godinu na poziciji „Transfera za poticaj zapošljavanja i razvoja privrede“ u iznosu 100.000,00 KM koristit će se za realizaciju ciljeva u oblasti zapošljavanja i samozapošljavanja i to:

- poticanje novog zapošljavanja, očuvanje i kreiranje novih radnih mjesta,
- poticanje konkurentnosti proizvoda i usluga, razvojnog istraživanja te unapređenja tehnoloških postupaka u svrhu zaštite okoliša, proširenja ponude, poboljšanja kvalitete i uspješnosti,
- razvoj kreativnosti i inovativnosti, te poduzetničkih kompetencija, stvaranje poticajnog okruženja za samozapošljavanje mladih kroz realizaciju vlastitih poslovnih ideja, jačanje radnih kompetencija za zapošljivost mladih i utjecaj na razvoj poduzetničke kulture mladih,
- finansiranje programa razvoja poduzetništva i mikro, malih i srednjih preduzeća po povoljnijim uslovima,
- promocija ženskog poduzetništva, ekonomsko osnaživanje žena uključivanjem u poduzetničku aktivnost.

Postupak dodjele navedenih poticaja izvršit će se na transparentan i javan način uz primjenu objektivnih kriterija kod vrednovanja aplikacija za dodjelu poticaja.

U dijelu razvoja Turizma na području općine Zavidovići planira se realizacija projekta „Unapređenje turističke ponude izletišta Kamenica i Spomenika prirode Tajan – uređenje parking prostora“ kroz angažman finasijskih sredstava u iznosu od oko 25.000,00 KM u saradnji sa Ministarstvom za privredu Zeničko-dobojskog kantona. Izgradnja parking prostora neophodna je kako bi se omogućilo nesmetano parkiranje vozila posjetilaca izletišta Luke, a da se pri tome ne ugrozi odvijanje i bezbjednost saobraćaja na ovom lokalitetu.

II.2. – OBLAST IZGRADNJE INFRASTRUKTURNIH OBJEKATA

II.2.1. – Saobraćajna infrastruktura

Tokom 2020. godine poslovi vezani za saobraćajnu infrastrukturu (lokalne ceste i gradske ulice) na području općine Zavidovići vršit će se u skladu sa Planom i programom održavanja i zaštite i program rekonstrukcije, izgradnje i obnove lokalnih cesta i gradskih ulica za 2020. godinu koji donosi Općinski načelnik na koji Općinsko vijeće Zavidovići daje saglasnost u skladu sa odredbama Zakona o cestama Federacije Bosne i Hercegovine (“Službene novine Federacije BiH“, broj: 12/10,16/10 i 66/13). Na području općine Zavidovići se nalaze 22 lokalne ceste, ukupne dužine 115,00 km i 36 gradskih ulica, ukupne dužine 22,971 km i 26 prigradskih i strmih ulica, ukupne dužine 14,806 km. Aktivnosti iz Plana i Programa planirane su u skladu sa materijalnim okvirima, odnosno planiranim namjenskim sredstvima namijenjenim za finansiranje radova na održavanje i zaštitu gradskih ulica i lokalnih cesta, te rekonstrukciju, izgradnju i obnovu lokalnih cesta i gradskih ulica. Poznato je da su realne potrebe za realizaciju planskih aktivnosti na lokalnim cestama i gradskim ulicama daleko veće od finasijskih mogućnosti. Planom i Programom za 2020. godinu obuhvaćeno je izvršenje prioritarnih poslova za potrebe lokalnih cesta i gradskih ulica i to:

1. Radovi održavanja javnih cesta,
2. Rekonstrukcija i izgradnja lokalnih cesta, cestovnih objekata i gradskih ulica,
3. Implementacija projekata iz primljenih donacija.

Cjelokupna politika upravljanja lokalnim cestama i gradskim ulicama bit će usmjerena na izvršenje prioritarnih poslova na lokalnim cestama i gradskim ulicama, koji se ogledaju u slijedećem:

- kontinuirano održavanje cestovne mreže u cilju zaštite projektovanog stanja cesta i obezbjeđenja zadovoljavajuće sigurnosti i potrebne prohodnosti na cestama;
- zamjena istrošenog i potpuno amortizovanog asfaltnog zastora na najkritičnijim dionicama ceste i cestovnim pravcima sa znatnijim povećanjem intenziteta prometa u proteklom periodu;
- poboljšanje stanja prometa i povećanje nivoa bezbjednosti rekonstrukcijom nepovoljnih elemenata ceste i obnovom građevinskih objekata na trasi ceste.

Osnovni ciljevi sanacije gradskih ulica su:

- sprječavanje propadanja cesta,
- omogućavanje sigurnog prometa,
- smanjenje troškova korisnika dobrim stanjem cesta,
- dovođenje cesta u projektovano stanje uzimajući u obzir izmijenjene potrebe prometa.

Pregled planiranih aktivnosti na rekonstrukciji, izgradnji i obnovi lokalnih cesta:

Red. br.	Lokalna cesta	Opis radova	PLAN 2020
			Ukupno (KM) i Izvor finansiranja
1.	Rekonstrukcija puta Vikovići -Brašljevine	Vrsta radova: - Rekonstrukcija gornjeg stroja saobraćajnice	30.000,00 KM, budžetska sredstva
2.	Rekonstrukcija puta Zavidovići -Dubravica	Vrsta radova: - Izrada gornjeg nosećeg i habajućeg sloja	20.000,00 KM, budžetska sredstva
3.	Rekonstrukcija puta Zavidovići -Gornji Kovači - Vrela	Vrsta radova: - Rekonstrukcija puta - izrada gornjeg nosećeg i habajućeg sloja	30.000,00 KM, budžetska sredstva
4.	Rekonstrukcija puta Mramorje -Mednjik	Vrsta radova: - Rekonstrukcija puta - izrada gornjeg nosećeg i habajućeg sloja	20.000,00 KM, budžetska sredstva
5.	Sanacija puta Krivaja - Smailbašići - Fazlići	Vrsta radova: - Sanacija kolovozne konstrukcije	20.000,00 KM, budžetska sredstva
6.	Sanacija puta Dolac – Rujnica -Tursići	Vrsta radova: - Sanacija kolovozne konstrukcije	30.000,00 KM, budžetska sredstva
7.	Rekonstrukcija puta Mećevići -Pašin Konak	Vrsta radova: - Rekonstrukcija gornjeg stroja puta	50.000,00 KM, budžetska sredstva
UKUPNO LOKALNE CESTE:			200.000,00 KM

Pregled planiranih aktivnosti na rekonstrukciji, izgradnji i obnovi gradskih ulica:

Red. br.	Gradska ulica	Opis radova	PLAN 2020
			Ukupno (KM) i Izvor finansiranja
1.	Rekonstrukcija ulice „Omladinska“	Vrsta radova: - Rekonstrukcija kolovozne konstrukcije	15.000,00 KM budžetska sredstva
2.	Rekonstrukcija ulice „Gazije“	Vrsta radova: - Sanacija kolovozne konstrukcije	20.000,00 KM, budžetska sredstva

3.	Rekonstrukcija ulice „Uljički put“	Vrsta radova: - Pojačanje kolovozne konstrukcije	15.000,00 KM, budžetska sredstva
4.	Rekonstrukcija ulice „Prvomajska“	Vrsta radova: - Izrada asfaltnog kolovoza	20.000,00 KM, budžetska sredstva
5.	Rekonstrukcija ulice „15. Septembar“	Vrsta radova: - Radovi na izradi gornjeg nosećeg sloja i kolovoznog zastora	50.000,00 KM, budžetska sredstva
6.	Rekonstrukcija ulice „Radnička“	Vrsta radova: - Radovi na izradi gornjeg nosećeg sloja i kolovoznog zastora	50.000,00 KM, budžetska sredstva
7.	Rekonstrukcija raskrsnice ulice „Zlatnih Ljiljana“ i ulice „Husein -kapetan Gradašćević“	Vrsta radova: - Proširenje kolovoza za jednu saobraćajnu traku (izlivna traka)	30.000,00 KM, budžetska sredstva
8.	Rekonstrukcija ulica u naselju „Caritas“	Vrsta radova: - „Presvlačenje“ postojeće kolovozne konstrukcije	20.000,00 KM, budžetska sredstva
UKUPNO GRADSKE ULICE:			220.000,00 KM

II.2.2. – Vodni objekti

Shodno sredstvima koja će biti raspoloživa Općini Zavidovići prema Programu utroška sredstava vodnih naknada Zeničko-dobojskog kantona za 2020. godinu, Općina Zavidovići će kandidirati najprioritetnije projekte iz ove oblasti, zavisno od kriterija koji budu postavljeni prilikom kandidovanja istih.

Pored realizacije projekata iz Programa utroška sredstava vodnih naknada Zeničko-dobojskog kantona za 2020. godinu, planira se realizacija i to:

- Izgradnja vodovoda „Sedra“ u MZ Kovači,
- Izrada glavnog projekta centralnog rezervoara za sistem vodosnabdijevanja Rasječenica – Brezik.

II.2.3. – Objekti zaštite od poplava i erozivnog djelovanja voda

U izgradnji objekata za zaštitu od poplava, kod Agencije za vodno područje sliva rijeke Save je aplicirano za sredstva za realizaciju projekata u 2020. godini, te će se raditi na realizaciji projekata koji budu odobreni, odnosno podržani finansijski:

1. Nastavak projekta „Uređenje korita rijeke Bosne u Zavidovićima“ na lijevoj obali u iznosu od 800.000,00 KM,
2. Nastavak uređenja ušća rijeke Krivaje u rijeku Bosnu u iznosu od 450.000,00 KM,

3. Uređenje ušća rijeke Gostović u rijeku Bosnu u iznosu od 600.000,00 KM,
4. Obezbijeđenje proticajnog profila korita rijeke Krivaje u naseljenom mjestu Brezik polje-Luka na lokaciji Hum u iznosu od 200.000,00 KM,
5. Obezbijeđenje proticajnog profila korita rijeke Krivaje u naseljenom mjestu Ribnica u iznosu od 130.000,00 KM,
6. Izrada projektne dokumentacije i sanacija lijeve obale rijeke Krivaje ispod romskog naselje „Rupin Do“ koja bi obuhvatila sanaciju klizišta koje se proteže obalom duž regionalne ceste Zavidovići-Ribnica cca. 300 m sa ostavljanjem mogućnosti izgradnje treće kolovozne trake. Navedeno klizište ozbiljno ugrožava saobraćajnicu i prijeti njenom uništenju, a što bi izazvalo prekid putne komunikacije uz sliv rijeke Krivaje. Procijenjena vrijednost nužnih radova iznosi cca. 500.000,00 KM,
7. Izrada projektne dokumentacije i sanacija klizišta lijeve obale rijeke Krivaje na lokalnoj cesti Vozuća-Ribnica (stara trasa), iza mosta u naseljenom mjestu Ribnica, koje ugrožava stabilnost ceste u dužini cca. 21 m. Procijenjena vrijednost radova iznosi cca. 90.000,00 KM,
8. Sanacija klizišta desne obale rijeke Bosne ispod naselja „Caritas“ u Zavidovićima. Navedeno klizište ugrožava dio stambenog naselja od 22 stambena objekta, odnosno 44 stana, od čega je na desetak objekata vidljiva pojava pukotina uzrokovana kretanjem zemljane mase obale. Procijenjena vrijednost radova iznosi cca. 400.000,00 KM i
9. Izrada projektne dokumentacije i sanaciji klizišta desne obale rijeke Bosne u naselju „Batvice“ koje ugrožava stambene objekte u blizini obale. Procijenjena vrijednost radova iznosi cca. 400.000,00 KM.

II.2.4. – Objekti za odvodnju i prečišćavanje otpadnih i odvodnju površinskih voda

Također će se iz sredstava koja će biti raspoloživa Općini Zavidovići prema Programu utroška sredstava vodnih naknada Zeničko-dobojskog kantona za 2020. godinu, Općina Zavidovići će kandidirati najprioritetnije projekte iz ove oblasti, zavisno od kriterija koji budu postavljeni prilikom kandidovanja istih i to:

- Izgradnja kanalizacije Gornja Dubravica,
- Izgradnja kanalizacije Potkleče,
- Izgradnja kanalizacije M. Spahe, Vučjak, Dragovac,
- Izgradnja kanalizacije kod Ćirine vode,
- Izgradnja kanalizacije Potklečju, zaseok Avdići (kod džamije),
- Izrada glavnog projekta rješavanja otpadnih, oborinskih i površinskih voda u ulici „Zlatnih Ljiljana“ i naselja Potkleče.

II.2.5. – Javna rasvjeta

Tokom 2020. godine nastaviti će se u skladu sa finansijskim mogućnostima uvoditi energetski efikasniji sistem javne rasvjete i vršiti poboljšanja stanja u oblasti javne rasvjete, u cilju smanjenja budžetske potrošnje sredstava koja se svake godine izdvajaju za finansiranje troškova potrošnje električne energije i za popravke kvarova na javnoj rasvjeti. Paralelno sa ovim aktivnostima provodit će se aktivnosti na izgradnji javne rasvjete na djelovima općine Zavidovići koja nema izgrađenu javnu rasvjetu. U skladu sa planiranim sredstvima u Budžetu općine Zavidovići planira se izgradnja osam novih javnih rasvjeta, a dinamika njihove izgradnje zavisit će od izdavanja potrebnih odobrenja za građenje i ostalih saglasnosti (uključujući i rješavanje imovinsko-pravne odnose). Također se planira projektovanje rekonstrukcije javne rasvjete u užem gradskom dijelu općine Zavidovići.

III – OBLAST OBRAZOVANJA

U 2020. godini nastaviti će se sa kontinuiranim aktivnostima iz prethodnih godina vezanih za organizaciju i provođenju općinskog takmičenja učenika osnovnih i srednjih škola u znanju u saradnji sa Pedagoškim zavodom Zeničko-dobojskog kantona i školama sa područja općine Zavidovići u kojima se realizuje takmičenje učenika u znanju iz određenih predmeta.

Radi stimulisanja i nagrađivanja učenika generacije s ciljem motivacije svih učenika za zalaganje u daljem školovanju i postizanju još boljih rezultata, provodit će se tokom 2020. godine dodjela nagrade za posebno nadarene studente “Nagrada - Alen Mehmedović”, dodjela stipendija Općine Zavidovići i dodjela studentskih stipendija Ministarstva obrazovanja, nauke, kulture i sporta Zeničko-dobojskog kantona.

Ponovo će se provoditi postupak odabira i finansiranja projekata inkluzivne nastave iz sredstava planiranih Budžetom općine Zavidovići za 2020. godinu, čime se želi postići efekti inkluzije u obrazovne procese djece sa poteškoćama u razvoju.

IV – OBLAST ZDRAVSTVA

U cilju izvršavanja Zakonom o zdravstvenoj zaštiti u Federaciji Bosne i Hercegovine (“Službene novine FBiH”, broj: 46/10) i Zakonom o pravima, obavezama i odgovornostima pacijenata (“Službene novine FBiH”, broj: 40/10) pristupit će se formiranju Zdravstvenog savjeta općine Zavidovići. Naime, društvena briga za zdravlje na nivou općine obuhvata ocjenjivanje rada zdravstvenih ustanova i kvaliteta zdravstvenih usluga, kao i osiguranje finansijskih sredstava za unapređenje njihovog rada i kvaliteta zdravstvenih usluga u skladu sa potrebama stanovništva i mogućnostima jedinice lokalne samouprave u skladu sa posebnim zakonom o principima lokalne samouprave u Federaciji. Ova društvena briga ostvaruje se osnivanjem zdravstvenog savjeta na nivou općine koji planira i evaluira provođenje zdravstvene zaštite na području jedinice lokalne samouprave, daje mišljenje na planove i programe zdravstvene zaštite za područje lokalne samouprave, predlaže mjere za poboljšanje dostupnosti i kvaliteta zdravstvene zaštite, prati povrede prava pacijenata i poduzima mjere za unapređenje tih prava na svom području, te obavlja i druge poslove i zadatke u skladu sa propisima o pravima, obavezama i odgovornostima pacijenata.

Radi brige o zdravstvenoj zaštiti građana općine Zavidovići iz svoje nadležnosti izvršit će se nabavka senzora za bezbolno mjerenje nivoa šećera u krvi za djecu oboljelu od dijabetesa; vršit će se finansiranje rada hitne medicinske pomoći i higijensko - epidemiološke djelatnosti, prijevoz pacijenata na hemodijalizu, radioterapiju i kemoterapiju, te finansirati medicinske usluge pružene populaciji penzionera i boraca oboljelih od PTSP-a.

V – OBLAST SOCIJALNE ZAŠTITE

Oblast socijalne zaštite je jedna od aktivnosti u okviru koje se kontinuirano izvršavaju povjereni poslovi i zadaci i koji će se izvršavati i tokom 2020. godine. Pored finansiranja rada JU „Centar za socijalni rad“ Zavidovići, odnosno finansiranja rada Ustanove i finansiranje naknada koje se isplaćuju iz sredstava Budžeta općine Zavidovići za 2020. godinu, vršit će se sufinansiranje za sufinansiranje JU “Centar za djecu i odrasle osobe s posebnim potrebama Zeničko-dobojskog kantona”. Nadalje će se vršiti sufinansiranje i praćenje redovnog rada i aktivnosti OO “Crveni križ ” Zavidovići, kao i podrška aktivnostima koje bude provodio (akcije dobrovoljnog davanja krvi, edukacija o minama i sl.), sufinansiranje i praćenje redovnog rada i aktivnosti MDD „Merhamet” Zavidovići u cilju ublažavanja teške socijalne situacije za građane/porodice sa gradskog područja i prigradskih naselja kroz organizaciju i rad javne kuhinje, te vršiti finansijsku podršku Udruženju roditelja djece sa poteškoćama u razvoju „Mala sirena“ Zavidovići.

Pristupit će se formiranju Koordinacionog tijela na nivou općine Zavidovići za prevenciju, zaštitu i borbu protiv nasilja u porodici u saradnji sa Udruženjem „MEDICA“ Zenica i drugim relevantnim institucijama radi provođenja potrebnih aktivnosti oko formiranja Koordinacionog tijela. Cilj koji se želi postići formiranjem Koordinacionog tijela jeste poduzimanje aktivnosti na prevenciji i adekvatnom pružanju potrebnih informacija žrtvama nasilja u porodici, pružanju pomoći žrtvama nasilja u porodici, te informisanje javnosti o ovoj problematici. U okviru ovih aktivnosti vršit će se sufinansiranje rada Sigurne kuće Udruženja „MEDICA“ Zenica putem koje će se obezbijediti potrebni kapaciteti za hitnu intervenciju i pružanje adekvatnog smještaja ženama, djevojkama i djeci žrtvama nasilja u porodici tokom njihovog oporavka (stručna i medicinska pomoć, individualni i terapijski rad i savjetovanje, porodična i okupaciona terapija, pravna pomoć i slično).

IV – KULTURNO-HISTORIJSKO NASLIJEĐE

Zbog postojanja potrebe za aktivnijim učešćem Općine Zavidovići u oblasti kulturno-historijskog naslijeđa, radit će se na stvaranju uslova za aktivniju ulogu lokalne zajednice u oblasti zaštite i promocije kulturno-historijskog naslijeđa koje se nalazi na teritoriji Općine. Trenutno stanje u ovoj oblasti je da na području općine Zavidovići postoje određeni kulturno-historijski sadržaji koje je potrebno sačuvati za buduća vremena. Efekti koji će se postići realizacijom ovog cilja je zaštita i korištenje kulturno-historijskog naslijeđa, te informisanost građana (posebno mladih) o kulturno-historijskom naslijeđu i potrebi njegovog čuvanja. Na ovaj način će se stvoriti preduslovi za planski razvoj turizma, podizanje ugleda lokalne zajednice u domaćim i međunarodnim okvirima. Na realizaciji ovog cilja poduzimat će se sljedeće aktivnosti:

- Uspostava aktivne saradnje sa ustanovama, institucijama i drugim relevantnim subjektima koji su nadležni za kulturno-historijsko naslijeđe Bosne i Hercegovine;
- Formiranje evidencije kulturno-historijskog naslijeđa;
- Pokretanje procedura rješavanja pravnog statusa dijela kulturno-historijskog naslijeđa;
- Izrada pisanog materijala i predstavljanje kulturno-historijskog naslijeđa.

U proteklom periodu ove aktivnosti su se izvršavale stihijski, bez kontinuiteta u njihovom izvršavanju. Također su ove aktivnosti vođene od strane pojedinaca, neformalnih grupa i udruženja građana, što je (uz puno uvažavanje njihovog rada) moglo za posljedicu imati trajno oštećenje ili uništenje ovog naslijeđa ukoliko se njegovom očuvanju i obnovi pristupalo nestručno ili uz nepoznavanje procedura koje je potrebno primijeniti kod zaštite i obnove kulturno-historijskog naslijeđa. Zbog toga poslovi na ovom polju koji se planiraju izvršavati tokom 2020. godine predstavljaju početak organizovanog pristupa prema kulturno-historijskom naslijeđu i koji će se na ovaj način provoditi u budućem vremenu.

V – MJESNA SAMOUPRAVA

Općinsko vijeće Zavidovići je u proteklom periodu dalo veliki značaj radu mjesnih zajednica općine Zavidovići kroz razmatranje izvještaja o njihovom radu, opredjeljenje za realizaciju projekata u mjesnim zajednicama, te kroz održavanje tematske sjednice o radu mjesnih zajednica. Ovaj značaj mjesnih zajednica determinisao je programske aktivnosti u 2020. godini kada je u pitanju mjesna samouprava i rad mjesnih zajednica općine Zavidovići. Programske aktivnosti bit će usmjerene ka povećanju efikasnosti rada savjeta mjesnih zajednica i unapređenju saradnje Općine Zavidovići i mjesnih zajednica. Aktivnosti koje će se provoditi tokom realizacije cilja su

- Edukacija članova savjeta mjesnih zajednica;

- Uvođenje prakse elektronske komunikacije za upite i konsultacije između Općine Zavidovići i mjesnih zajednica;
- Povremeno prisustvo rukovodioca službe stručnog saradnika sjednicama savjeta mjesnih zajednica;
- Pružanje pomoći u opremanju ureda mjesnih zajednica.

Intenzitet i kvantitet planiranih aktivnosti je uslovljen raspoloživim sredstvima, te će se raditi na tome da se ove aktivnosti provode udruživajem sredstava nekoliko budžetskih potrošačkih jedinica Općine Zavidovići iz sredstava koja su namijenjena za iste ili slične izdatke.

VI – OBLAST PRAVA BORAČKE POPULACIJE

Provođenje postupka dodjele sredstava pomoći za upošljavanje kod poslodavaca i samozapošljavanje (Prvi biznis i Biznis plus) aplikanata pripadnika boračkih populacija po javnom oglasu nastaviti će se provoditi tokom 2020. godine, u skladu sa Uredbom i Instrukcijom ministarstva za boračka pitanja ZE-DO kantona, te vršiti će se praćenje realizacije ukupnih projekata. Efekti koji se očekuju od realizacije ovog cilja je poboljšanje materijalnog statusa demobilisanih boraca i povećanje zaposlenosti na području općine Zavidovići. U proteklom periodu uočen je porast broja privrednih subjekata koji podnose aplikacije za dodjelu poticaja za zapošljavanje demobilisanih boraca i porast broja demobilisanih boraca koji podnose aplikacije za dodjelu poticaja u svrhu samozapošljavanja, te se očekuje ovaj trend porasta aplikanata u 2020. godini.

Također će se tokom 2020. godine okončati postupak procedure po konkursu za dodjelu stipendije studentima branilačkih populacija i na osnovu Konačne liste utvrđene od strane nadležnog Ministarstva za pitanja boraca Zeničko-dobojskog kantona za akademsku 2019./2020. godinu; provesti i okončati postupak realizacije sredstava pomoći za stambeno zbrinjavanje aplikanata pripadnika boračkih populacija po javnom oglasu i Instrukciji Ministarstva za pitanja boraca Zeničko-dobojskog kantona; provesti Javni poziv odabira korisnika pomoći za nabavku udžbenika učenicima osnovne i srednje škole, korisnika banjsko-fizikalnog liječenja i nabavka ortopedskih pomagala za pripadnike branilačke populacije; provesti rješavanje zahtjeva za nadoknadu troškova za liječenje, jednokratnih vanrednih novčanih pomoći, troškova dženaze i drugih zahtjeva za pripadnike branilačke populacije.

Nastavit će se započeti projekti i aktivnosti na izgradnji, sanaciji i održavanju lokalnih spomen - obilježja u skladu sa planiranim sredstvima iz budžeta Federacije Bosne i Hercegovine, Zeničko-dobojskog kantona i Općine Zavidovići uz davanje prioriteta završetaku već započetih projekata.

VII – OBLAST STAMBENE IZGRADNJE

U saradnji sa Federalnim ministarstvom raseljenih osoba i izbjeglica tokom 2020. godine očekuje se realizacija projekta za odabrane korisnike za obnove stambenih jedinica za raseljena lica u skladu sa raspoloživim sredstvima po konačnoj rang - listi i javnom pozivu Federalnog ministarstva raseljenih osoba i izbjeglica iz decembra 2019. godine. Naime, radi se o 16 odabranih korisnika i to: 7 stambenih objekata sa totalnom štetom i 9 objekata sa djelimičnim oštećenjima. Program rekonstrukcije stambenih jedinica je takav, da ministarstvo obezbjeđuje građevinski materijal dok ugradnju u vlastitoj režiji izvode korisnici.

Realizacija potpisanog Sporazuma o provođenju Podprojekta BIH 6 – državnog projekta stambenog zbrinjavanja u okviru Regionalnog stambenog projekta (RSP) započet će sa realizacijom u 2020. godini. Naime, pomenutim projektom planirana je izgradnja 16 stambenih jedinica u okviru objekta kolektivnog stanovanja, prema prethodno urađenoj

projektno-tehničkoj dokumentaciji. Općini Zavidovići prema potpisanom sporazumu opredijeljeno je 489.304 EUR (ili 956.955KM) za izgradnju objekta dok se doprinos Općine Zavidovići sastoji od ustupanja građevinski opremljenog zemljišta i priključaka na komunalnu infrastrukturu. Tokom 2019. godine urađen Glavni projekat i pripremljena građevinska dozvola, a početkom 2020. godine očekuje se raspisivanje Javnog poziva od strane Ministarstva i odabir izvođača radova, te izvođenje radova u skladu sa dinamikom Investitora. Općina Zavidovići pored obezbjeđenja građevinske parcele za izgradnju, na ime rente i UGGZ-a izdvojiti će cca 6.000,00 KM, i na ime troškova 16 priključaka na elektro i vodovodnu mrežu oko 50.000 KM.

Nastavit će se u 2020. godini sa realizacijom projekta Razvojni program Ujedinjenih naroda, koje implementira organizacija United Nations Development Programme – UNDP u partnerstvu sa nevladinom organizacijom Hilswerk Internacional Austrija (HWA). Na području općine Zavidovići odabrano je 13 korisnika koji su ispunili uslove za izgradnju novih objekata. Tokom realizacije ovog projekta Općina Zavidovići je izrazila interes za učešće u projektu izgradnje kuća sa ciljem trajnog stambenog zbrinjavanja porodica čije su kuće uništene, a koji provodi UNDP. Program za oporavak od poplava – stambeno zbrinjavanje pruža podršku samoodrživom oporavku kroz sanaciju i izgradnju stambenih jedinica i ekonomsko osnaživanje socijalno-ugroženih osoba čiji su domovi oštećeni ili uništeni u poplavama i klizištima.

VII – OBLAST GEODETSKIH POSLOVA

Nakon okončanog postupka dodjele ugovora o javnoj nabavci Uspostava katastra komunalnih uređaja, tokom 2020. godine radit će se na ovom projektu do konačnog njegovog završetka, odnosno uspostava Katastra komunalnih uređaja općine Zavidovići sa ažurnim i pouzdanim podacima. Također će se tokom prve polovine 2020. godine raditi na realizaciji projekta izrade nove gravimetrijske mreže tačaka koji će se implementirati sa Federalnom upravom za geodetske i imovinsko-pravne poslove Sarajevo. U cilju jedinstvenog pristupa na cijelom prostoru Federacije Bosne i Hercegovine kada je u pitanju određivanje adresa zgrada i objekata, započet će se u 2020. godini sa realizacijom projekta „Adresni registar općine Zavidovići koji će se implementirati sa Federalnom upravom za geodetske i imovinsko-pravne poslove Sarajevo.

VIII – OBLAST PROSTORNOG PLANIRANJA

U okviru poslova iz oblasti prostorog uređenja tokom 2020. godine radit će se na izradi Regulacionog plana „Kamenica I“ Zavidovići i Regulacionog plana „Maoča I“ Zavidovići, te na izmjenama i dopunama Regulacionog plana „Luke“ Zavidovići. Također će se raditi na provođenju postupka usvajanja izmjena i dopuna Urbanističkog plana grada Zavidovići.

IX- OBLAST POLJOPRIVREDE

Strategija razvoja poljoprivrede općine Zavidovići za period 2018. – 2023. dala je osnovne smjernice mogućeg razvoja poljoprivrede na području općine Zavidovići u narednih 6 godina, na osnovu koje će se realizovati programske aktivnosti iz oblasti poljoprivrede u 2020. godini. Tokom 2020. godine realizovat će se nekoliko projekata, zasnovanih na saradnji sa nevladinim sektorom i poljoprivrednim proizvođačima. Osnovno opredjeljenje Strategije razvoja poljoprivrede općine Zavidovići za period 2018-2023 je “robna (komercijalna) proizvodnja”, pa će i sredstva za razvoj biti programski usmjerena u tom pravcu. Nastavit će se sa aktivnostima vođenja registra poljoprivrednih gazdinstava i registra klijenata, te će se vršiti

implementacija podsticaja za poljoprivredu i pružanje stručne pomoći poljoprivrednim proizvođačima.

X – OBLAST KOMUNALNIH POSLOVA

Nastavit će se sa implementacijom Zakona o upravljanju i održavanju stambenih i stambeno-poslovnih zgrada, nakon što je na području općine Zavidovići izvršen izbor privrednog društva koje će obavljati poslove upravitelja zgrada. U okviru ovoga potrebno je pružiti potrebnu stručnu pomoć vlasnicima stanova oko izrade potrebnih akata i organizovanja poslova oko uspostave sistemskog rješavanja problema vezanih za održavanje zajedničkih dijelova zgrada i uređaja u stambenim i stambeno-poslovnim zgradama.

Zbrinjavanje otpada će se provoditi primarno kroz realizaciju Projekta zatvaranja i sanacije gradske deponije i izgradnje pratećih sadržaja. Tokom 2020. godine pokušat će se obezbijediti novčana sredstva za nastavak radova na zatvaranju gradske deponije. Proširenje zone obuhvata prikupljanja otpada će se provoditi u skladu sa Planom i raspoloživim kapacitetima i spremnošću JKP "Radnik" d.o.o. Zavidovići za ove poslove. Nastavit će se sa uklanjanjem divljih deponija u skladu sa raspoloživim sredstvima i utvrđenim prioritetima lokacija na kojima će se provoditi ove aktivnosti.

XI – OBLAST OTKLANJANJA POSLJEDICA PRIRODNE NESREĆE

U okviru Projekta hitnog oporavka od poplava, Komponenta 2: Rehabilitacija ključne javne infrastrukture, *Podkomponenta 2A: Rehabilitacija regionalne infrastrukture*, kojeg provodi Federalno ministarstvo poljoprivrede, vodoprivrede i šumarstva i koje finansira Svjetska banka, nastavit će se sa izgradnjom mosta Dolina-Alići, koji je preprojektovan sa mogućnosti korištenja mosta za lahki saobraćaj.

Nadalje je u okviru ovog Projekta planira toko 2020. godine završiti izgradnja mosta na lokaciji „7. kilometar“, rijeka Gostović u preostalom iznosu od 85.000,00 KM.

XII – OBLAST DEMINIRANJA

U 2020. godini planiran je deminerski zadatak uklanjanja kasetne municije na području mjesne zajednice Ribnica. Zadatak treba da krene početkom marta, i prema procjenama trajat će najmanje 6 mjeseci. Zadatak će izvoditi demineri Oružanih snaga BiH. Općina Zavidovići se obavezala da će deminerima obezbijediti smeštaj u blizini izvršavanja zadatka. Zadatak će obuhvatiti cca 200.000 m². Uklanjanjem opasnosti od zaostale kasetne municije omogućit će se sigurno okruženje za mještane mjesne zajednice Ribnica, kao i za sve one koji posjećuju istu. Mještanima će se osigurati sigurni pristup njihovim dobrima, obradivim površinama i šumama, kao i samim stambenim objektima.

XIII – OBLAST OPĆINSKE ADMINISTRACIJE

Tokom 2020. godine izvršit će se potpunjavne radnih mjesta koja su ostala upražnjena zbog prestanka radnog odnosa državnih službenika i namještenika koji su radili na istim (penzionisanje, sporazumni raskid, smrt i sl.) kako se ne bi povjereni poslovi i zadaci obavljali smanjenim obimom i intezitetom. U cilju organizacije posla iz nadležnosti općinskog organa državne službe, pristupit će se uspostavljanju nove organizacije posla donošenjem novog pravilnika o unutrašnjoj organizaciji poslova na raspoređene državne službenike i namještenike. Radi usklađivanja Pravilnika o radnim odnosima sa zakonskim propisima koji su stupili na snagu nakon donošenja Pravilnika pristupit će se donošenju novog Pravilnika o radnim odnosima u jedinstvenom općinskom organu uprave Općine Zavidovići.

Nastavit će sa unapređenjem Informatičnog sistema u radu općinskih službi za upravu u cilju stalnog nadzora nad rješavanjem zahtjeva građana u propisanim rokovima, kao i implementacija trezorskog poslovanja primjenom softvera za trezorsko poslovanje i time uvesti kontrolu u finansijskom poslovanju.

Slijedom navedenih aktivnosti u ovoj oblasti koje će se provoditi u 2020. godini u cilju unapređenja rada općinske administracije, pristupit će se izvršenju zadanih ciljeva i provođenjem mjera na njihovom ostvarenju definisanim Akcionim planom za prevenciju nastanka korupcije u Općinskom organu državne službe Općine Zavidovići za period 2018. - 2020. godine koji je usvojen Odlukom općinskog vijeća Zavidovići („Službeni glasnik općine Zavidovići“, broj: 5/2018).

Obradio:


(Nermin Čahatović)



Prilog:

1. Program rada Službe za upravu ekonomskih poslova i poduzetništva za 2020. godinu,
2. Program rada Službe za upravu društvenih djelatnosti i opću upravu za 2020. godinu,
3. Program rada Službe za upravu pitanja boraca, raseljenih lica i izbjeglica za 2020. godinu,
4. Program rada Službe za upravu geodetskih, imovinsko-pravnih poslova i urbanizma za 2020. godinu,
5. Program rada Službe za upravu civilne zaštite za 2020. godinu,
6. Program rada Službe za upravu poljoprivrede, vodoprivrede i komunalnih poslova za 2020. godinu,
7. Program rada Kabineta općinskog načelnika za 2020. godinu.